

Grupo di Duc in Altum a tuma despedida di Pader Fransen

ORANJESTAD - Despues di a permanece pa mas cu cuarenta aña na Aruba Pader Wijbe Fransen ta repatria pa Hulanda na juni proximo. Siendo un religioso di e Orden di San Dominico Pader Fransen a traha pa mas cu trinta aña den parokia como sacerdote y como dies aña na Centro Pastoral Aruba.

Pader Fransen durante e periodo di 2005 pa 2008 tabata e director spiritual di e curso di Duc in Altum, un estudio na unda a participa como 40 persona tanto laiconan como maestronan di scol. Tur e personanan aki a ricibi nan diploma como trahado pastoral hubenil y ta prepara pa traha cu hobennan sea den parokia of na scol ariba e tereno di formacion spiritual. Tambe nan por asisti den e diferente trabounan di evangelisacion cu ta bou guia di Centro Pastoral Aruba.

Recientemente e grupo di Duc in Altum a tuma despedida di Pader Fransen durante un celebracion eucaristico na Iglesia Fatima na Dakota sigui

pa un desayuno cu un programa special dedica na Pader Fransen y Pader Jacques van der Lee kende tambe lo regresa Hulanda. Tabata tin declamacion di un poesia di Digna

Lacle-Herrera, canto, drama y presentacion di varios regalo. Un regalo special ta un cuadro pinta pa e artista Elvis Tromp kende a haci un bunita obra pa un recuerdo pa Aruba di e trabou di e ultimo tres padernan Hulandes, esta pader Bouman, kende ya a regresa Hulanda, pader Fransen y Pader van der Lee.

Cu baymento di e padernan menciona ta finalisa un mision di 140 aña di padernan Hulandes di Orde di San

Dominico. Pader Fransen y Pader van der Lee, conoci como padernan Dominicano a traha den Iglesia, hospital, organisacionnan social manera SAMBA, Osticeba

y Fundacion Reclassering y ultimamente na Centro Pastoral. E grupo di Duc in Altum lo bay pone nan conocimiento den practica door di bay traha

cu hobennan den tur parokia na Aruba p'asina yuda nan den nan formacion spiritual cu ta hopi importante pa nan por biba leu for di tur adiccio cu ta menasa e hubentud awendia.



Ariba e foto Pader Fransen cu e bunita cuadro memey di tur e trahadornan pastoral hubenil di Duc in Altum.